


1. apríl 2025

SKATTSPOR IÐNAÐARINS 464 MILLJARÐAR KRÓNA - STÆRST ALLRA ÚTFLUTNINGSGREINA

Árið 2023 nam skattspor íslensks iðnaðar 464 milljörðum króna samkvæmt niðurstöðum Reykjavík Economics og er stærst meðal útflutningsgreina. Um er að ræða umtalsverða fjárhæð enda er íslenskur iðnaður ein af undirstöðum íslensks efnahagslífs. Til samanburðar námu útgjöld hins opinbera til heilbrigðismála 354 milljörðum króna árið 2023 og til menntamála 250 milljörðum króna. Þetta sýnir að iðnaðurinn stendur undir stórum hluta af starfsemi hins opinbera, þar sem skattspor iðnaðarins mælir framlag greinarinnar til samfélagsins í formi skattgreiðslna. Greiningin byggir á skýrslu Reykjavík Economics og byggist á sömu aðferðafræði og fyrri greiningar af sama toga.

Skattspor iðnaðar og útgjöld hins opinbera

Í milljörðum kr., 2023




Skattspor iðnaðarins það stærsta meðal útflutningsgreina

Skattspor iðnaðarins er stærst allra útflutningsgreina. Til samanburðar nam skattspor ferðapjónustunnar 180 milljörðum króna árið 2023, sem er ríflega helmingi minna en skattspor iðnaðarins. Í skýrslu Reykjavík Economics er fjallað um heildarskattspor iðnaðar, einnig nefnt vítt skattspor. Það eru þær tölur sem vísað er til hér að framan. Til viðbótar er reiknað svokallað þröngt skattspor iðnaðarins, sem er víða skilgreint skattspor að frádregnum útskatti virðisaukaskatts. Þröngt skattspor iðnaðarins nam 209 milljörðum króna


Þröngt skattspor

Í milljörðum kr., 2023



Vítt skattspor

Í milljörðum kr., 2023




árið 2023. Til samanburðar nam þröngt skattspor ferðaþjónustunnar 107 milljörðum króna og sjávarútvegsins 89 milljörðum króna sama ár.

Þessar tölur undirstrika mikilvægi iðnaðarins fyrir skatttekjur ríkisins og endurspegla jafnframt umfang hans í íslensku efnahagslífi. Verðmætasköpun greinarinnar nam 900 milljörðum króna í fyrra, sem er um fjórðungur landsframleiðslunnar. Í greininni starfa 52 þúsund manns, eða einn af hverjum fjórum á innlendum vinnumarkaði, og stór hluti skattsporsins eru vinnuaflostengdir skattar. Iðnaðurinn er jafnframt stærsta útflutningsgrein þjóðarbúsins og aflaði 750 milljarða króna í útflutningstekjur í fyrra, sem jafngildir 39% af heildarútflutningstekjum. Að auki hefur greinin veruleg jákvæð áhrif á aðrar atvinnugreinar. Ljóst er því að iðnaðurinn stendur bæði undir stórum hluta skatttekna ríkisins og hagsældar þjóðarinnar.

Skattspor iðnaðarins fjölpætt og víðfeðmt

Við útreikning á skattspori íslensks iðnaðar studdist Reykjavík Economics við ársreikninga greinarinnar í gagnagrunni Hagstofu Íslands. Skattsporið árið 2023 samanstendur af eftirfarandi þáttum:




Iðnaður leggur mikið til atvinnusköpunar hér á landi og er í því sambandi skattspor hennar m.t.t. vinnuaflostengdra skattgreiðslna hátt eða 202 milljarðar króna árið 2023. Það er ekki einungis að í greininni starfi um 52 þúsund eða einn af hverjum fjórum starfandi á íslenskum vinnumarkaði heldur eru laun í greininni einnig há og yfir meðallaunum í hagkerfinu. Endurspeglar það háa framleiðni vinnuafls í greinum iðnaðar.

Í skýrslu Reykjavík Economics er skattsporið reiknað út niður á helstu greinar iðnaðarins. Atvinnugreinaflokkun ÍSAT2008 var nýtt við greininguna og iðnaðurinn flokkaður í:

- Hugverkaiðnað: Heildarskattspor hugverkaiðnaðar nam 136 milljörðum króna og þröngt skattspor 71 milljarði króna.
- Byggingarstarfsemi og mannvirkjagerð: Heildarskattspor byggingarstarfsemi og mannvirkjagerðar nam 188 milljörðum króna árið 2023, en þröngt skattspor greinarinnar var 74 milljarðar króna.
- Aðra iðnaðarframleiðslu (án fiskvinnslu): Heildarskattspor annarrar iðnaðarframleiðslu (án fiskvinnslu) var 140 milljarðar króna, þar af voru 75 milljarðar þröngt skattspor. Þessi flokkur samanstendur að mestu af orkusæknum iðnaði.

Skattspor iðnaðar

Í milljörðum kr., 2023



Hin hliðin á peningnum: Ísland er háskattaland

Þrátt fyrir að skattspor iðnaðarins sé mikið endurspeglar það einnig háa skattbyrði á íslensk fyrirtæki. Ríflega 32% af verðmætasköpun íslenska hagkerfisins rennur til hins opinbera í formi skatta sem er hátt í alþjóðlegum samanburði. Álögur hins opinbera á fyrirtæki og heimili á Íslandi eru miklar miðað við flest önnur ríki.

Skattar og gjöld á íslensk fyrirtæki eru margþætt og margar álögur teljast mjög íþyngjandi fyrir atvinnulífið. Háir skattar draga úr samkeppnishæfni, markaðshlutdeild, fjárfestingum, verðmætasköpun og fjölda starfa.

Skatttekjur hins opinbera fyrir OECD ríki 2022

% af landsframleiðslu

